

DEFINISI KAFFARAH

Perkataan kaffarah diambil daripada kata akar kafara (كفر) yang bermaksud menutup. Kaffarah dinamakan sedemikian kerana ia menutup dosa dan diberikan keringanan oleh Allah S.W.T. Kaffarah dari segi istilah Syarak adalah menunaikan kewajipan berbentuk harta atau tubuh badan disebabkan meninggalkan sesuatu tanggungjawab atau kewajipan hukum Syarak. Dengan ini, ia boleh dirumuskan sebagai suatu tindakan yang boleh menghapuskan dosa sama ada dengan membebaskan hamba, bersedekah atau berpuasa dengan syarat-syarat tertentu.

HIKMAH PENSYARIATAN KAFFARAH

Memandangkan manusia secara tabiinya pernah melakukan kesilapan dan kecuaiian serta melampaui batasan yang ditetapkan oleh Allah S.W.T. lalu terjerumus dalam perkara yang haram menyebabkan pelakunya mendapat kemurkaan dan hukuman tertentu menurut Syariat Islam, antaranya kaffarah. Sehubungan itu, kaffarah disyariatkan adalah untuk :

- Menjadi penyebab bagi pesalah untuk bertaubat.
- Meringankan bebanan rasa bersalah kerana melakukan maksiat.
- Mengingatkan agar manusia tidak mengambil mudah dengan peraturan hukum-hukum-Nya.

HUKUM MEMBAYAR KAFFARAH

Kaffarah adalah satu bentuk hukuman yang ditentukan oleh Allah S.W.T. terhadap mereka yang melakukan sesuatu kesalahan tertentu sama ada yang dilarang secara mutlak oleh Allah S.W.T atau melanggar sesuatu kewajipan yang dibuat dengan pilihan sendiri. Semua bentuk kesalahan yang melibatkan kaffarah wajib ditunaikan mengikut ketetapan bagi setiap kesalahan. Tidak ada ruang untuk tidak melakukan kecuali dalam keadaan-keadaan tertentu sahaja iaitu tidak mampu secara mutlak mengikut sesetengah fuqaha.

Kaffarah kerana melakukan persetubuhan dalam bulan Ramadan adalah wajib. Begitu juga kaffarah kerana melanggar sumpah, tidak sempurna nazar, ingin kembali kepada isteri yang diziharkan dan seumpamanya. Ini kerana semua kesalahan-kesalahan tersebut telah dinyatakan oleh nas mutawatir daipada al-Quran dan al-Sunnah jika dilakukan akan menyebabkan pihka yang bersalah dikenakan kaffarah.

SEBAB DAN KESALAHAN DIKENAKAN KAFFARAH

Terdapat beberapa sebab dan kesalahan yang dikenakan kaffarah iaitu:

1. Persetubuhan pada siang hari bulan Ramadan

- Orang yang melakukan persetubuhan menyedari bahawa dia sedang berpuasa.
- Mengetahui pengharaman persetubuhan di siang hari bulan Ramadan.
- Persetubuhan itu berlaku bukan kerana paksaan.
- Puasa yang dibatalkan dengan persetubuhan itu adalah puasa Ramadan.
- Bukan orang yang mendapat rukhsah untuk berbuka puasa.

Kaffarah kerana melakukan persetubuhan pada siang hari bulan Ramadan adalah mengikut turutan berikut:

- Memerdekakan seorang hamba; atau
- Jika tidak mampu atau tiada hamba, hendaklah berpuasa selama dua bulan berturut-turut; atau
- Jika tidak mampu berpuasa, hendaklah memberi makan kepada enam puluh orang fakir miskin.

2. Melanggar sumpah

Sumpah dari segi istilah Syarak bererti menguatkan sesuatu dengan menyebut nama atau sifat Allah S.W.T. yang tertentu. Berdasarkan definisi tersebut, sumpah hanya boleh berbentuk dengan menggunakan sama ada nama-nama Allah S.W.T. seperti al-Rahman, al-Rahim dan seumpamanya, atau sifat-sifat khusus bagi Allah S.W.T., kekuasaan Allah S.W.T. dan seumpamanya.

Contohnya lafaz sumpah adalah: "Demi Allah, sesungguhnya aku akan melakukan ini atau "Demi Zat yang jiwa ragaku berada pada kekuasaan-Nya, sungguh aku akan lakukan ini" atau seumpamanya.

Para ulama telah sepakat secara ijmak bahawa sumpah dengan selain daripada Allah S.W.T adalah ditegah dan tidak boleh dilakukan. Namun, para ulama berbeza pendapat mengenai kedudukan kaffarah kepada sumpah tersebut jika dimungkiri. Pandangan yang lebih tepat adalah yang mewajibkan pembayaran kaffarah. Bagi menjadikan sesuatu sumpah diambil kira dan sah, ia mesti memenuhi beberapa syarat asas, iaitu:

- Pelaku sumpah itu hendaklah berakal, baligh dan muslim. Dengan ini, tidak sah sumpah yang dilakukan oleh kanak-kanak orang gila dan kafir.
- Bukan sumpah yang lagha, iaitu sumpah yang dilakukan tanpa niat oleh pelakunya.
- Sumpah itu hendaklah dilakukan dengan menggunakan sama ada nama-nama Allah S.W.T. atau sifat-sifat khusus bagi-Nya.

Hukum sumpah yang telah memenuhi segala syarat tersebut adalah wajib, mesti ditunaikan oleh pelakunya. Jika dia melanggar sumpah, maka dia berdosa dan wajib membayar kaffarah. Hukum tersebut berdasarkan firman Allah S.W.T:

Maksudnya:

“ dan janganlah kamu merombak(mencabuli) sumpah kamu sesudah kamu menguatkannya (dengan nama Allah)”

(Surah al-Nahl, ayat 91)

Kaffarah sumpah bertujuan menutup dosa yang ditanggung oleh orang yang bersumpah kerana tidak menepati atau memungkiri sumpahnya. Selain itu, beliau juga mesti bertaubat di atas kesalahannya.

Kaffarah sumpah bermula dengan pilihan dan berakhir dengan tertib. Maksudnya, pada peringkat awal diberi pilihan menunaikan kaffarah kepada tiga jenis perkara iaitu:

- Memberi makan sepuluh orang miskin; atau
- Memberi pakaian kepada sepuluh orang fakir miskin; atau
- Memerdekakan hamba.

Jika tidak mampu melakukan tiga pilihan di atas, maka mengikut tertib berikutnya hendaklah dia berpuasa tiga hari sama ada secara berturut-turut atau tidak berturut-turut. Fuqaha telah bersepakat bahawa puasa hanya boleh dilakukan jika dia tidak mampu melakukan tiga pilihan di atas.

3. Melanggar nazar

Nazar adalah janji kepada Allah S.W.T. Mengikut al-Mawardi, nazar ialah iltizam(mewajibkan diri) untuk melakukan qurbah (sesuatu yang boleh menghampirkan diri dengan Allah) yang pada asalnya tidak wajib di sisi Syarak.

Dengan ini nazar adalah janji untuk melakukan kebaikan dengan niat mendekatkan diri kepada Allah S.W.T. sama ada secara bersyarat atau tidak. Dengan ini, sesuatu perkara kebaikan atau kebajikan berbentuk ibadah yang asalnya tidak wajib ke atas seseorang menurut hukum islam menjadi wajib setelah dinazarkan.

Bagi menjadikan sesuatu nazar itu sah, fuqaha telah menetapkan beberapa syarat asas, iaitu:

- Nazar hendaklah bertujuan mendapatkan keredaan Allah S.W.T. dan berbentuk ketaatan.

- Perkara yang dinazarkan hendaklah terdiri daripada sesuatu yang mampu dilakukan oleh manusia.
- Nazar hendaklah bukan berbentuk sesuatu perkara yang tidak disyariatkan oleh Allah S.W.T.

Berdasarkan ayat al-Quran dan al-Sunnah mengenai pensyariatan nazar, maka hukum sesuatu nazar yang memenuhi syarat-syarat yang ditetapkan adalah wajib dan mesti ditunaikan, maka penggantinya adalah dengan membayar denda, iaitu kaffarah. Hukum ini juga merangkumi nazar yang tidak dibolehkan mengikut kebanyakan fuqaha. Oleh itu, jika seseorang bernazar tidak boleh dilakukan, tetapi ia wajib bayar kaffarah.

Kaffarah nazar adalah sama kadarnya dengan kaffarah sumpah, iaitu sebagaimana di bawah:

- Memberi makan sepuluh orang miskin; atau
- Memberi pakaian kepada sepuluh orang fakir miskin; atau
- Memerdekakan hamba.

Jika tidak mampu melakukan tiga pilihan di atas, maka mengikut tertib berikutnya hendaklah dia berpuasa tiga hari sama ada secara berturut-turut atau tidak berturut-turut. Fuqaha telah bersepakat bahawa puasa hanya boleh dilakukan jika dia tidak mampu melakukan tiga pilihan di atas.

4. Ila'

Ila' ialah sumpah yang dibuat oleh seorang suami yang mampu bersetubuh untuk tidak menyetubuhi isterinya selama tempoh lebih daripada empat bulan atau tanpa menyebutkan tempoh atau dengan selama-lamanya.

Ila' boleh dilakukan dengan menggunakan lafaz sama ada secara sarih atau kinayah. Lafaz sarih adalah lafaz yang terang dan jelas seperti: "Demi Allah saya tidak akan bersetubuh dengan kamu selama lebih dari empat bulan". Sementara lafaz kinayah pula adalah lafaz yang tidak menunjukkan ila' kecuali dengan niat seperti ucapan suami: " Saya tidak akan sentuh kamu selama empat Bulan".

Hukum ila' adalah haram kerana telah mengharamkan persetubuhan dengan isteri yang halal dinikahi. Jika tempoh empat bulan telah tamat, dan suami masih tetap dengan sumpahnya, beliau dianggap telah memudaratkan isterinya. Pada ketika itu, dengan tuntutan daripada pihak isteri, Hakim berhak mengambil salah satu daripada tindakan berikut:

- Memaksa suami menarik balik sumpahnya dan kembali semula kepada isterinya setelah membayar kaffarah ila'.
- Memaksa suami menceraikan isterinya jika dia enggan menarik balik sumpahnya dan tetap berpegang dengan sumpahnya.

5. Zihar

Imam syafii mendefinisikan zihar sebagai lafaz suami menyamakan mana-mana anggota zahir isteri dengan anggota wanita mahram secara kekal(mu'abbad) kepada suami. Jika seorang suami mengatakan kepada isterinya : "Belakang awak adalah sama seperti belakang ibu saya," atau menyatakan: "Saya lihat awak sama seperti emak saya," maka berlakulah zihar.

Perkataan belakang hanya sebagai kiasan sahaja, sedangkan ia merangkumi semua anggota tubuh badan kecuali mata kerana ia bukan zihar yang jelas. Wanita yang dijadikan perbandingan ialah wanita yang haram dikahwini oleh suami, maka merangkumi semua wanita mahram secara berkekalan sama ada berdasarkan keturunan, persemendaan dan penyusuan. Jika diniatkan sebagai suatu penghormatan maka tidak menjadi zihar, sebaliknya jika diniatkan talak maka ia menjadi zihar.

Syarak telah melarang suami melakukan zihar dan menganggap sebagai suatu perkara yang mungkar dan dusta. Hukum zihar adalah haram. Setelah cukup syarat dan sabit zihar maka haram bagi suami menyetubuhi isterinya (yang diziharkan) kecuali tidak mahu menunaikan kaffarah. Jika suami tidak mahu menunaikan kaffarah maka dia mesti menceraikan isterinya.

Kaffarah zihar adalah mengikut turutan di bawah:

- Memerdekakan seorang hamba; atau
- Jika tidak mampu atau tiada hamba, hendaklah berpuasa dua bulan berturut-turut; atau
- Jika tidak mampu berpuasa, hendaklah memberi makan kepada 60 orang fakir miskin.

6. Pembunuhan tidak sengaja

Pembunuhan secara tidak sengaja seperti kemalangan jalan raya, tertembak dan seumpamanya tidak dikenakan qisas tetapi dikenakan diat atau kaffarah berdasarkan firman Allah S.W.T dalam ayat 92 surah al-Nisa' sebagaimana dinyatakan sebelum ini. Ayat tersebut pada zahirnya menunjukkan bahawa hukuman kaffarah adalah diwajibkan kerana membunuh secara tidak sengaja. Maka syariat telah meletakkan hukum kaffarah kepada mereka yang melakukan perbuatan tersebut dan ia tidak akan gugur sehingga ditunaikan kewajipan tersebut. Begitu juga hukum pembunuhan menyerupai dengan sengaja (syibh al-amd).

Orang yang telah disabitkan kesalahan membunuh dengan sengaja boleh dijatuhkan hukuman asas iaitu qisas, gentian yang terdiri daripada diat atau kafarah, dan hukuman tambahan, iaitu haram menerima pusaka, wasiat dan berdosa.

Qisas adalah bunuh balas bunuh terhadap pembunuh. Jika ia tidak dilaksanakan sama ada kerana tidak mencukupi syarat-syarat ataupun kerana digugurkan hukuman qisas oleh ahli keluarga maka mesti membayar diat. Diat ialah pembayaran sejumlah harta kerana melakukan suatu jenayah yang melibatkan nyawa atau anggota badan.

Mengenai kaffarah keatas penjenayah yang membunuh dengan sengaja, fuqaha berselisih pendapat mengenainya. Imam Syafii berpendapat bahawa kaffarah diwajibkan ke atas penjenayah yang membunuh secara sengaja, kerana jika hukuman ini diwajibkan keatas pembunuh tidak sengaja ataupun yang menyerupai sengaja maka lebih-lebih lagi hukuman kaffarah ini diwajibkan kerana kesalahan membunuh secara sengaja.

Imam Abu Hanifah, Malik dan Ahmad pula berpendapat bahawa bagi penjenayah bunuh secara sengaja tidak diwajibkan hukuman kaffarah, kerana nas-nas mengenai pembunuhan secara sengaja dengan jelas menyebutkan bahawa hukumannya ialah qisa dan tidak menyebutkan hukuman kaffarah baginya. Walau bagaimanapun, Imam Malik menyarankan bahawa supaya penjenayah yang membunuh dengan sengaja dikenakan hukuman kaffarah jika hukuman qisa digugurkan sama ada kerana sebab-sebab yang menghalang hukuman qisa ataupun kerana penjenayah itu telah dimaafkan.

Kaffarah pembunuhan tanpa niat atau tidak sengaja adalah mengikut turutan di bawah:

a) Memerdekakan seorang hamba; dan

- Membayar diat sekiranya orang yang dibunuh itu adalah seorang Muslim, atau daripada kaum kafir yang ada ikatan perjanjian setia dengan orang Islam (termasuklah ahli kitab dan kafir zimmi); atau
- Tidak perlu membayar diat sekiranya orang yang dibunuh itu adalah seorang Muslim di Negara orang-orang kafir yang bermusuhan dan memerangi Islam (kafir harbi); atau

b) Jika tidak mampu atau tiada hamba, maka hendaklah berpuasa selama dua bulan berturut-turut beserta taubat nasuha.

Hukuman atau kaffarah ini merangkumi semua pesalah sama ada lelaki atau wanita kecuali dalam masalah persetubuhan siang hari dalam bulan Ramadan, kaffarah hanya akan dikenakan ke atas suami.

Kadar kaffarah (dengan memberi makan) adalah secupak makanan asasi. Sementara secupak adalah satu perempat gantang Baghdad. Oleh yang demikian, kadar semasa Kaffarah ini adalah sama dengan kadar semasa Fidyah.